



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela



CONVENIO DE COLABORACIÓN CULTURAL ENTRE A CONSELLERÍA DE CULTURA E TURISMO E A ASOCIACIÓN GALEGA DE EDITORAS (AGE), PARA A ASISTENCIA E PARTICIPACIÓN NAS FEIRAS INTERNACIONAIS DO LIBRO, REALIZACIÓN DE ACTIVIDADES DE PROMOCIÓN E CONSOLIDACIÓN DO SECTOR DO LIBRO E MANTEMENTO DA ASOCIACIÓN, 2020.

En Santiago de Compostela,

22 XULL. 2020

REÚNENSE:

Dunha parte, a Consellería de Cultura e Turismo (en adiante, “a Consellería”) e no seu nome e representación, Román Rodríguez González, en virtude do seu cargo de Conselleiro de Cultura e Turismo, para o que foi nomeado polo Decreto 97/2018, do 26 de setembro de 2018, no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia e o artigo 2 da Resolución do 8 de abril de 1991, pola que se publica o acordo do Consello da Xunta de Galicia do 27 de marzo de 1991.

Doutra, a Asociación Galega de Editoras, con NIF G15130594, (en adiante a AGE) e no seu nome e representación, José Antonio Ballesteros Rey, na súa condición de presidente da AGE, segundo as facultades que lle outorgan os seus estatutos.

As dúas partes interveñen en función dos seus respectivos cargos e no exercicio das facultades que detentan, se recoñecen reciprocamente capacidade legal suficiente para o outorgamento deste convenio de colaboración e, en consecuencia,

EXPOÑEN:

Que as dúas entidades son conscientes da necesidade de actuacións de carácter sociocultural que permitan unha adecuada oferta, co obxecto de satisfacer as necesidades en materia cultural.



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

Que a Xunta de Galicia ten atribuídas funcións en materia de fomento da cultura, de acordo co establecido no artigo 27.19º do Estatuto de Autonomía, en consonancia co estipulado no artigo 148.1º.17ª da Constitución Española. Dentro dese ámbito competencial, a Consellería de Cultura e Turismo vén desenvolvendo dende anos atrás unha serie de actuacións encamiñadas á divulgación, información e promoción da cultura, para achegar o máximo posible o noso patrimonio cultural á sociedade en xeral.

A Consellería de Cultura e Turismo quere acometer a realización de actividades de promoción e divulgación do patrimonio e da cultura galega; mediante a programación de actuacións de recuperación da nosa cultura preténdese acadar unha maior eficacia na consecución destes obxectivos, por medio do desenvolvemento de actividades culturais e de fomento da cultura en lingua galega.

A AGE, fundada hai 34 anos, conta con 36 editoriais asociadas na actualidade, exerce o labor de representación das empresas editoriais galegas de ámbito privado. Integrada na Federación de Gremios de Editores de España, a AGE encárgase da xestión e defensa dos intereses comúns das editoras galegas e a promoción e difusión dos libros publicados por elas. Dende o ano 2011, todas as editoriais galegas que desenvolven unha actividade profesional poden integrarse na asociación, con independencia da lingua na que editen.

A AGE proporciona servizos de información actualizada sobre o sector do libro, con boletíns informativos semanais referidos a calquera asunto de interese para o negocio editorial: internacionalización, actualidade sobre o sector, dixitalización, feiras do libro, etc. Tamén difunde toda aquela información xerada polas organizacións empresariais galegas polas institucións que traballan no sector cultural.

Entre os seus obxectivos destacan os seguintes:

-Consolidación do sector do libro. A AGE persigue a consolidación dun sistema editorial galego, obxectivo que esixe a existencia de empresas competitivas en Galicia.

- Integración e cooperación intersectorial . A AGE trata de estreitar e mellorar as relacións con todos os axentes que integran a cadea de valor do libro: distribuidoras, librarías, bibliotecas, asocia-



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

cións de escritores/as, asociación de ilustradores/as, imprentas e empresas proveedoras de tecnoloxía.

- **Profesionalización do sector.** Co fin de axudar e promover a profesionalización do sector, a AGE organiza diversos seminarios e xornadas formativas que abordan os aspectos máis salientables do ámbito produtivo e comercializador: dixitalización, venda online, plataformas de distribución, ferramentas e aplicacións que optimizan a xestión da cadea de valor do libro, etc.

- **Apoio diante dos novos retos impostos pola dixitalización.** A información puntual de todos os avances, decisións estratéxicas e demandas do conxunto do sector contribúen e reforzan o traballo iniciado na nova xeira, que duplica o sistema produtivo e esixe o incremento do esforzo económico.

- **Promoción e visibilización da produción propia.** A entidade conta cunha comisión de promoción do libro que xa organizou numerosas actividades orientadas a visibilizar o libro galego. Froito dese traballo xurdiron os *outlets* do libro, a campaña *Ser Libris*, e o Culturgal. En 2020 a AGE elaborará unha nova campaña de carácter divulgativo sobre o libro galego, en formato documental ou vídeo.

- **Cooperación e establecemento de sinerxías con outros sectores culturais.** A Asociación trata de lograr a cooperación con outros sectores culturais participando en iniciativas como *Firma e Filme*, un proxecto que ten por finalidade estudar as posibilidades de adaptación de obras literarias galegas ao noso audiovisual.

Con este convenio asegúrase a realización de diversas manifestacións da cultura galega levadas a cabo por entidades que a queren dar a coñecer, mediante a súa promoción dentro e fora do noso país, coa organización de actividades que permitan un maior coñecemento dela.

Por isto, para acadar unha maior eficacia na execución de actuacións, dado o interese común das partes asinantes, que teñen intereses coincidentes, é polo que asinan este convenio de colaboración, de acordo coas seguintes,

ESTIPULACIÓNS



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

PRIMEIRA.- OBXECTO

É obxecto deste convenio coa AGE a colaboración nos gastos de funcionamento da entidade e na realización de diversas actividades culturais, accións de fomento e promoción da lectura e do libro como motor do coñecemento.

SEGUNDA.- ACTUACIÓNS

1.- Asistencia e participación en feiras profesionais

A asistencia e participación nas feiras internacionais do libro son unha das actividades anuais que para a AGE resultan fundamentais para dar a coñecer a produción galega no exterior. Este ano a situación sanitaria de pandemia polo COVID-19 impediu a participación nas mesmas, optando pola asistencia unicamente á LIBER. A Asociación deseñará material promocional (directorios, bolsas, marca páxinas...) e catálogos propios para favorecer o traballo da AGE e das empresas asociadas.

- Feira Internacional do Libro LIBER.

No mes de outubro ten lugar a feira LIBER, do 7 ao 9, promovida pola Federación de Gremios de Editores de España e organizada por Fira Barcelona, que acada en 2020 a trixésimo oitava edición. A AGE estará representada nesta feira pola secretaria técnica do gremio e está previsto que á feira se desprace unha delegación de 8 editoras asociadas.

2.- Simposio O Libro e A Lectura 2020

A nova edición *O Simposio: o libro e a lectura* celebrarase con toda probabilidade no mes de setembro de 2020. O Simposio vénse desenvolvendo ininterrompidamente dende hai 16 anos, nesta edición, ademais da colaboración da Consellería de Cultura da Xunta contará coa colaboración da Concellería de Educación do Concello de Santiago de Compostela (co pagamento directo a prove-



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

dores). É unha das actividades culturais máis relevantes das que celebra o sector en Galicia, tanto polo público profesional inscrito como pola categoría dos profesionais, moitos deles o ámbito internacional, que participaron nas 16 edicións xa celebradas.

3.- Xornadas venda de dereitos e participación nas feiras

A situación actual provocada pola COVID-19 fai replantearse novas estratexias para o sector editorial e asociadas da AGE, deberán buscar novas vías de saída a esta grave crise. Este ano a Asociación Galega de Editoras volverá ofrecer ás súas empresas asociadas senllas xornadas profesionais en venda de dereitos para a participación en feiras, previsiblemente impartidas pola axente literaria, Carlota Torrents, da axencia de venda de dereitos, Asterics Agents.

As xornadas estarán dirixidas ás editoras que hai tempo participan nunha feira pero empregan as mesmas estratexias e desexarían obter máis rendemento do investimento que supón asistir a unha feira do libro a nivel internacional. Hoxe en día, as empresas editoras son conscientes da importancia da internacionalización e que comprar ou vender dereitos resulta fundamental para a supervivencia dalgunhas casas editoriais.

4.- CULTURGAL

A Feira das Industrias Culturais de Galicia – CULTURGAL, celebra un ano máis outra edición, en Pontevedra, entre o 28 e o 30 de novembro. A Feira naceu hai anos froito da vontade da AGE e a colaboración con outras asociacións profesionais. As empresas editoriais galegas participan de forma activa e desenvolven múltiples accións de promoción: mesas redondas, presentacións de libros, foros de debate... e, por suposto, presentación das súas novidades editoriais nos respectivos stands e no da Asociación Galega de Editoras.

5.- MANTEMENTO DA ASOCIACIÓN GALEGA DE EDITORAS

A Asociación Galega de Editoras distribúe os gastos de mantemento da entidade fundamentalmente en:

6.- Cotas Federación de Gremios de Editores de España



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

A Asociación Galega de Editoras pertence á Federación de Gremios de Editores de España (FGEE), unha asociación profesional de dereito privado creada en 1978 para a representación e defensa dos intereses xerais do sector editorial español. Estar federada supónlle á AGE un gasto importante, cunha achega de 9.345,00 euros anuais distribuídas trimestralmente en cotas de 2336,25 euros.

7.- Secretaría técnica e directiva da AGE

A Asociación Galega de Editoras conta desde outubro de 2016 con novas instalacións para dar un servizo puntual ás empresas asociadas. A maiores contratouse unha secretaria técnica co fin de dar cobertura ás necesidades da propia Asociación. Esta nova situación incrementou os gastos da AGE, tanto os fixos (mantemento do local e salario) como os variables (desprazamentos da secretaría e/ou de membros da directiva a feiras internacionais, reunións periódicas na Federación de Gremios de Editores de España e CEDRO, congresos e eventos doutros gremios etc...), condicións mínimas e imprescindibles para que a AGE poida vertebrar ao sector editorial galego.

A secretaria técnica acude habitualmente ás feiras internacionais en representación do gremio e das editoras asociadas co cometido de ofrecer información de calidade aos profesionais do sector que a solicitan –axentes literarios, editores estranxeiros e/ou distribuidores–; comunicación e difusión da axenda das editoras asociadas desprazadas e apoio nas súas actividades; participación nas actividades das editoras asociadas e/ou do sector, que poidan ser de interese ademais da elaboración dun informe interno do desenvolvemento das feiras.

Tanto a secretaria técnica como a executiva da AGE, principalmente o presidente da Asociación, son convocados anualmente a xuntanzas na Federación de Gremios de Editores de España e a CEDRO. A Federación celebra arredor de 3 ou 4 xuntanzas de secretarios/as na súa sede, ao ano e a entidade CEDRO celebra unha xuntanza anual coas entidades e autoría asociadas. A Asociación Galega de Editoras está representada nesta xuntanza pola secretaria técnica.

O presidente da AGE, pola súa parte, debe desprazarse á sede da Federación para asistir ás asembleas xerais da FGEE que se celebran anualmente, aproximadamente unha cada trimestre.

A secretaria técnica e o presidente da AGE (ou, na súa ausencia o vicepresidente) participan en congresos, conferencias e/ou encontros e actividades que convocan os demais gremios do Estado que son de interese para o noso sector.



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

TERCEIRA.- XUSTIFICACIÓN DA NON CONCORRENCIA COMPETITIVA

De acordo co artigo 26 da Lei de Subvencións non é posible promover a concorrência pública para a realización destas actividades, xa que a AGE leva a cabo actividades formativas que abordarán os aspectos máis salientables do ámbito produtivo e comercializador: dixitalización, comercialización on line, plataformas de distribución, ferramentas e aplicacións que optimizan a xestión da cadea de valor do libro, etc., constituíndo un apoio fundamental para o sector diante dos novos retos impostos pola dixitalización e as novas tecnoloxías da información.

Por todo o anterior é a AGE a que posúe a especificidade como beneficiaria así como a da actuación subvencionada e o interese social da axuda concedida.

Con data 30 de abril de 2020 o Consello da Xunta de Galicia acordou aprobar o Plan de reactivación dos sectores cultural e turístico fronte aos efectos derivados do Covid-19. As actuacións que se recollen neste convenio encaixan dentro do eixe 2 "*mantemento do emprego cultural*" medida: "*axudas para o fomento e dinamización da cultura*"

De acordo coa planificación estratéxica realizada pola Dirección Xeral de Políticas Culturais para o ano 2020, e dada a especificidade e exclusividade das actividades a realizar baseadas en criterios obxectivos, así como o interese social das mesmas, a sinatura deste convenio encádrase dentro dos previstos nese plan, nos que non é posible promover a concorrência, polas especiais características da entidade coa que se convenía, sendo a AGE a única que pode desenvolver na nosa comunidade autónoma as ditas actividades.

CUARTA.- COMPROMISOS DA CONSELLERÍA. FINANCIAMENTO

A Consellería de Cultura e Turismo comprométese a entregarlle á AGE a cantidade de Quince mil euros (15.000 €), como contribución para os gastos de funcionamento da asociación e para a realización das actividades de promoción e consolidación do sector do libro no ano 2020 que se desenvolverán dentro do ámbito de vixencia do presente convenio. Esta cantidade librarase con



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

cargo ás seguintes aplicacións orzamentarias, dos orzamentos xerais da Comunidade Autónoma para o ano 2020, co código de proxecto 201500372:

-11.20.432B.481.2: 5.000 €

-11.20.432B.781.1: 10.000 €

Os gastos de funcionamento son subvencionables si están directamente relacionados coa actividade a subvencionar e son indispensables para a execución da actividade.

Segundo o disposto no artigo 63 do Decreto 11/2009, de 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, a Consellería de Cultura e Turismo poderá realizar pagamentos anticipados que suporán achegas de fondos con carácter previo á xustificación, como financiamento necesario para poder levar a cabo as actuacións relacionadas co obxecto deste convenio. A cantidade máxima que se achegará como pago anticipado será de 9.000 €, 4.000 € que corresponderá aos gastos de funcionamento da AGE e 5.000 € que corresponderá aos gastos derivados das actuacións de carácter cultural, nun único anticipo. O segundo pagamento da cantidade restante non se realizará ata que estean integramente xustificadas a totalidade dos gastos correspondentes á actividade subvencionada.

O artigo 65.1 do Regulamento de subvencións de Galicia establece que os beneficiarios están obrigados á constitución de garantías cando se prevea a posibilidade de realizar pagamentos á conta ou anticipados; o artigo 65.4.i) recolle que quedarán exonerados da constitución de garantía os beneficiarios das subvencións concedidas cando os pagamentos non superen os 18.000 €.

QUINTA.- COMPROMISOS DA AGE

A AGE comprométese a destinar os fondos percibidos ao obxecto concreto para o que foron concedidos. A Consellería de Cultura e Turismo poderá comprobar, cando o considere pertinente, a execución das actividades obxecto deste convenio.



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

A AGE comprométese, pola súa parte, a facer constar en toda a publicidade que xeren estas actividades –tanto impresa como audiovisual– a colaboración da Xunta de Galicia, para o que utilizará a normativa da imaxe corporativa da Xunta de Galicia. Así mesmo, a AGE deberá dar cumprimento as obrigas de publicidade que se establecen no artigo 15.3 da Lei 9/2007, do 13 de xuño, de subvencións de Galicia e artigo 20,1 do Decreto 11/2009, do 8 de xaneiro.

A AGE comprométese ao cumprimento das obrigas contidas na Lei 9/2007, do 13 de xuño, de subvencións de Galicia e en especial as recollidas no artigo 11 desta norma. Tal como se recolle no apartado d) deste artigo, a AGE ten a obriga de comunicar a obtención doutras axudas, ingresos ou recursos que financien as actividades subvencionadas. Tamén será de aplicación o establecido no Decreto 11/2009, do 8 de xaneiro, Regulamento de subvencións de Galicia. Con carácter supletorio, será de aplicación o disposto na Lei 38/2003 xeral de subvencións e no seu regulamento, aprobado polo Real Decreto 887/2006, do 21 de xullo.

A AGE ten a obriga de prestar colaboración e facilitar canta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma e ao Consello de Contas, así como presentar a avaliación de resultados que figura na estipulación décimo segunda.

SEXTA.-COMPATIBILIDADE

A obtención desta axuda é compatible coa obtención doutras axudas, subvencións, ingresos ou recursos para a mesma finalidade procedentes de calquera outra Administración ou entes públicos ou privados, nacionais da Unión Europea ou de organismos internacionais. A suma do conxunto das axudas solicitadas e/ou concedidas para o obxecto do convenio non poderá superar o 100% do custo da actividade a desenvolver, que figura no convenio.

SÉTIMA.- COMPROBACIÓN DE DATOS



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

Para a tramitación deste convenio consultarase automaticamente os datos incluídos nos seguintes documentos elaborados polas administracións públicas:

Certificacións da AEAT, da Tesourería Xeral da Seguridade Social e da consellería competente en materia de facenda da Xunta de Galicia, acreditativas do cumprimento das obrigas tributarias e fronte á Seguridade Social, e de non ter pendente ningunha outra débeda coa Administración pública da Comunidade Autónoma, referido ás entidades locais.

No caso de opoñerse a esta consulta, deberán indicalo expresamente e, ao mesmo tempo, achegar os documentos oportunos. Excepcionalmente, no caso de que algunha circunstancia imposibilite a obtención dos citados datos, poderase solicitar ás persoas interesadas a presentación dos documentos correspondentes.

Así mesmo, de acordo co artigo 10 da Lei 9/2007, o beneficiario deberá presentar unha declaración responsable de non estar incurso en ningunha das prohibicións para obter a condición de beneficiario, sinaladas nos apartados 2 e 3 do citado artigo. Esta declaración deberá presentarse antes da sinatura do convenio.

OITAVA.- COMISIÓN MIXTA DE SEGUIMIENTO

Créase unha comisión mixta de seguimento para aclarar as dúbidas derivadas da interpretación e execución deste convenio, formada pola subdirectora xeral de bibliotecas da Consellería de Cultura e Turismo e polo director xeral de Políticas Culturais, ou persoas en quen deleguen.

Serán funcións da devandita Comisión a coordinación e seguimento das obrigas das partes no presente convenio e a resolución dos problemas de interpretación e cumprimento que poidan proporse con respecto ao convenio.

NOVENA.- GASTOS SUBVENCIONABLES. XUSTIFICACIÓN



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

A xustificación do cumprimento das condicións impostas e do seu custo deberá levarse a cabo de acordo co previsto nos artigos 28 e seguintes da Lei 9/2007. A data límite de presentación da documentación xustificativa da actividade e, se fora o caso, da xustificación dos gastos que restasen por aboar ata acadar o 100% da contía concedida, é o 30 de novembro de 2020

1- Serán subvencionables aqueles gastos que de maneira indubidable respondan á natureza da actividade subvencionada, dentro do prazo establecido e pagado antes de finalizar o período de xustificación. En todo o relativo aos gastos subvencionables deberá cumprirse o disposto no artigo 29 da Lei 9/2007, de 13 de xuño, de subvencións de Galicia.

As nóminas presentadas como xustificación deberán corresponder ao período e realización das actividades e na proporción na que realmente se dedique as mesmas, e ningunha deberá superar os 1.600 €

2- De conformidade co previsto na Lei 9/2007, de 13 de xuño, de subvencións de Galicia, para efectos desta xustificación consideraranse os gastos realizados durante o ano 2020, ata a data tope de xustificación da axuda, que respondan, en todo caso, á natureza da actividade subvencionada.

A documentación requirida na fase xustificativa presentarse electronicamente na Carpeta do cidadán da persoa solicitante/representante, <https://sede.xunta.gal/carpeta-do-cidadan>.

A AGE presentará electronicamente a xustificación da subvención dentro do prazo establecido e incluírá a seguinte documentación:

- Unha memoria de actuación xustificativa do cumprimento das condicións obxecto deste convenio, con indicación das actividades realizadas e dos resultados obtidos.
- Unha memoria económica xustificativa do custo das actividades realizadas, que conterá:
- Unha relación clasificada dos gastos e investimentos da actividade, con identificación do acredor, importe, data de emisión e data de pagamento.
- As facturas ou documentos de valor probatorio equivalente incorporados na relación á que se fai referencia no parágrafo anterior, e a documentación acreditativa do pagamento.



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

Cando a actividade fose financiada ademais de con esta subvención con fondos propios ou con outras subvencións ou recursos, deberá acreditarse na xustificación o importe, a procedencia e a aplicación de tales fondos ás actividades. O importe das subvencións en ningún caso poderá ser de tal contía que illadamente ou en concorrencia con outras subvencións, ingresos ou recursos, supere o custo da actividade subvencionada. Cando a Consellería advirta un exceso de financiación, minorará a subvención na parte proporcional. En caso contrario procederá o reintegro do exceso obtido sobre o custo da actividade subvencionada así como a esixencia do xuro de demora correspondente.

No caso de que a AGE non xustifique ou a xustificación sexa insuficiente, procederá o reintegro das cantidades percibidas e a esixencia do xuro de demora correspondente dende o momento do pagamento de subvencións ata a data na que se acorde a procedencia do reintegro.

De acordo co disposto no artigo 30.2 da Lei 9/2007, de subvencións de Galicia, as actuacións obxecto do convenio están sometidas á comprobación explícita da súa realización por partes dos servizos técnicos da Xunta de Galicia.

DÉCIMA.- PARTICIPACIÓN DOS COLABORADORES

O asinamento deste convenio non implica relación laboral, contractual ou de calquera outra índole entre os profesionais que vaian desenvolver as actividades previstas e a Xunta de Galicia, de tal xeito que a esta non se lle poderá esixir responsabilidade ningunha, nin directa, nin subsidiaria, polos actos ou feitos acaecidos no desenvolvemento do convenio.

DÉCIMO PRIMEIRA.- PUBLICIDADE

As partes asinantes deberán cumprir coas obrigas derivadas da entrada en vigor da Lei 1/2016, do 18 de xaneiro, de transparencia e bo goberno. Para tal fin, as partes aceptan que o texto do convenio se publique no Portal de Transparencia e Goberno aberto da Xunta de Galicia incluíndo os datos identificadores das persoas asinantes.



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela



Así mesmo, a AGE, acepta e consinte a remisión do convenio, logo da súa sinatura, ao Rexistro de Convenios da Xunta de Galicia, de conformidade co establecido no artigo 5 do Decreto 126/2006, do 20 de xullo, polo que se regula o Rexistro de convenios da Xunta de Galicia.

De acordo co establecido no artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa, que introduciu diversas modificacións na Lei 38/2003, do 17 de novembro, xeral de subvencións, o contido deste convenio será publicado na Base de Datos Nacional de Subvencións, nos termos recollidos no artigo 20 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

DÉCIMO SEGUNDA.- AVALIACIÓN DE RESULTADOS

Co fin de valorar os resultados finais en relación aos fondos públicos, unha vez presentada a xustificación, ou xunto con ela, en todo caso antes do 31 de decembro, a AGE deberá enviar unha avaliación dos resultados obtidos nas actividades obxecto do convenio, conforme o modelo que figura como Anexo I.

DÉCIMO TERCEIRA.-CAUSAS DE RESOLUCIÓN

As partes poderán denunciar ou modificar o presente convenio en calquera momento por mutuo acordo.

O incumprimento de calquera das obrigas contraídas no presente convenio por unha das partes facultará á outra para rescindilo, quedando automaticamente anulados todos os dereitos correspondentes sobre o obxecto do programa de colaboración conxunta, pero non así as obrigas contraídas no mesmo.



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

O incumprimento de calquera das cláusulas deste convenio constituirá causa suficiente para a súa rescisión, e así mesmo procederá o reintegro da subvención cando concorran algunhas das causas previstas no artigo 33 da Lei 9/2007, de 13 de xuño, de subvencións de Galicia.

Por transcurso do prazo de vixencia do presente convenio.

DÉCIMO CUARTA.- RÉXIME XURÍDICO

En todo o non previsto no presente convenio será de aplicación a Lei 9/2007, do 13 de xuño, de subvencións de Galicia e a súa normativa de desenvolvemento, Decreto 11/2009, de 8 de xaneiro. Aplicarase con carácter supletorio a Lei 38/2003, do 17 de novembro, xeral de subvencións.

Será de aplicación a Lei 40/2015, do 1 de outubro, de réxime xurídico do sector público.

Este convenio ten natureza administrativa. A xurisdición contencioso-administrativa será a competente para o coñecemento de posibles cuestións litixiosas que poidan suscitarse como consecuencia del.

DÉCIMO QUINTA.- VIXENCIA

O período de vixencia deste convenio será dende a súa sinatura e ata o 31 de decembro de 2020.

DÉCIMO SEXTA.- NOTIFICACIÓN ELECTRÓNICA

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e os empregados das administracións públicas para os trámites que realicen con elas por razón da súa condición de empregado público.



Xacobeo 2021



XUNTA DE GALICIA

CONSELLERÍA DE
CULTURA E TURISMO

Dirección Xeral de Políticas Culturais

Cidade da Cultura
Monte Gaias s/n
15707 Santiago de
Compostela

galicia

As notificacións realizaranse só por medios electrónicos a través do Sistema de Notificación Electrónica de Galicia Notifica, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

Este convenio obriga ás partes que o asinan ao seu cumprimento, e ambas as dúas sométense ao acordado en todas as estipulacións. Esténdese en duplicado exemplar, no lugar e data arriba indicados.

O conselleiro de Cultura e Turismo

Román Rodríguez González



O presidente da AGE

José Antonio Ballesteros Rey



Xacobeo 2021